

# Cart Nech De'en Bzoj San Pabən' Par Temtion'

**Pabən' chzoje' cart par Temtion'**

**1** Nada' Pab naca' apostol che Jesocristən'. Diozən' babebeje' chio'o xni'a de'e malən' na' zocho lez gon Cristo Jeso'osən' par nich žjəyecho len Diozən'. Lega'aque'enə' gwsə'one' mendad par naca' apostol. <sup>2</sup>Na' chzoja' le' Temtio dao'. Banona' le' ca xi'ina' laogüe de'en bsed blo'ida' le' par chonlilažo'o Xancho Cristo Jeso'osən'. Chona' orasyon chnaba' lao Xacho Diozən' na' lao Xancho Cristo Jeso'osən' əsa'aclenšgue' le', na' yesyə'əyašə' yesyə'əži'ililaže'e le', na' so'onšgue' ca so cuezo' binlo len xbab de'en yo'o lo'o yichjla'ažda'ogo'onə'.

**Nitə' beņə' choso'osed  
choso'olo'ine' dižə' güenlažə'**

<sup>3</sup>Catə'n gwza'a Efeson' par gwyə'a Masedonian', goža' le' yega'aņo' Efeson'. Bena' mendad yega'aņo' par nich əgwzejni'ido' balə beņə' nitə' na' de que cuich yoso'osed yoso'olo'ine' bitə'tezə' dižə' de'en cui zdan txen len xtižə' Diozən'. Na' che'enda' sotezo' gono' ca'. <sup>4</sup>Na' leczə' bzejni'iga'aque' de

que bitoch cue' yichjga'aque' che de'e xaxta'ocho ca'. Dia chega'aque' ca' zjənaque' beņə' zan. Na' de'e zan cuent chso'e chega'aque'. Gaquəyožcho šə cue' yichjcho che de'e ca'. Na' bito chsa'aclenən chio'o par nich gonlilažə'əcho Diozən' can' chene'ene' goncho.

<sup>5</sup>Cheyələ' əgwzejni'icho beņə' par nich so'onlilaže'e Diozən' do yichj do lažə'əga'aque' na' so'e latjə yeya' yeyib Diozən' yichjla'ažda'oga'aque'enə'. Na' šə so'one' ca' nachən' sa'acbe'ine' lo'o yichjla'ažda'oga'aque'enə' de que bito bi de'e mal chso'one'. Egwzejni'icho lega'aque' so'one' ca' par nich əsa'aque'ne' che Diozən' na' che ljuežjga'aque'. <sup>6</sup>Nitə' beņə' bagosə'əque'e nez malən'. Bito chso'onlilaže'e Diozən' do yichj do lažə'əga'aque'. Bito chso'e latjə yeya' yeyibe' yichjla'ažda'oga'aque'enə' na' zjəneze'ne' de que chso'one' de'e mal. De'e na'anə' chso'echgüe' dižə' de'e bito bi zaquə'ən. <sup>7</sup>Chse'enene' yoso'osed yoso'olo'ine' beņə' yoblə lei de'en bzoj de'e Moisezən' len bito chse'ejni'ine' bi dižə'ən chso'e na' nic chse'ejni'ine' bi zeje de'e ca' chəsə'əne' zjənaquən de'e žialao xen goncho.

<sup>8</sup>Na' ñezecho de que lein' naquən güen con šə gwčhinchon par əgwzejni'icho beñə' de que bito cheyalə' so'one' de'e mal.

<sup>9</sup>Cheyalə' ñezecho de que beñə' ca' bachso'on can' chene'e Diozən' bito chəsə'əyažjene' to lei de'e gwzejni'in lega'aque' de que cheyalə' so'one' de'e güen. Diozən' bnežjue' lein' par beñə' ca' cui chso'on can' nan na' par beñə' godenag ca' na' par beñə' ca' cui chso'elao' le', na' par beñə' ca' chso'ontezə chso'one' de'e malən', na' par beñə' ca' cui chso'on cas che Diozən', na' par beñə' ca' chesə'əgue'i de'en naquə de'e zaque'e lao Diozən', na' par beñə' ca' chso'ot xaxna'aga'aque', na' par yeziquə'əchlə beñə' güet beñə'. <sup>10</sup>Na' lecə bnežjue' lein' par beñə' ca' chesə'əgo'o xtoga'aque' na' par beñə' ca' chesə'əbejyichje' no'ol čhega'aque' o be'en čhega'aque' par chəsə'əzolene' beñə' yoblə, na' par beñə' byo ca' chesyə'əzolentezə ljuežj beñə' byoga'aque', na' par beñə' chəsə'əche'e beñə' yoblə la fuers na' chesə'ədi'ene' lao na' beñə' yoblə, na' par beñə' güenləžə', na' par beñə' ca' chsa'ac testigw fals contr ljuežjga'aque' lao jostis, na' par notə'ətezachlə beñə chso'on contr dižə' güen de'en chsed chlo'icho che Diozən'. <sup>11</sup>Lei na'anə' chonən txen len dižə' güen dižə' cobə che Diozən' ben' cho'ela'ochó. Na' le'enə' babene' lao na'a par chyixjui'a dižə' cobə che'enə' de'en naquə de'e güen juisy.

**Pabən' be'e yełə' choxcwlen  
che Diozən'**

<sup>12</sup>Cho'a yełə' choxcwlen che Xancho Jesocristən', čhedə'

le'enə' chone' fuers balor čhia' par chyixjui'a xtiže'enə'. Na' le'enə' gwleje' nada' par gona' xšine'enə' čhedə' gwñezene' de que zotezə zoa' chona' complir can' cheyalə' gona'. <sup>13</sup>Lechguale bachaclene' nada', len antslə ze'e gombi'ane' bžia bnita'ane' na' gwzi'ichiža'ane', na' bchi' bsaca'a beñə' ca' chso'onlilaže'ene'. Beyašə' beži'ilaže'e nada' la'anə'əczə bena' ca' čhedə' cuiñə' gonlilaža'ane' na' bito gocbe'ida' bin' chona'. <sup>14</sup>Na' Xancho Cristo Jeso'osən' blo'ine' nada' catequən' nži'ilaže'e nada' ca de'en chaclene' nada' par ničh bachonlilaža'ane' na' bachacda' che yeziquə'əchlə beñə' laogüe de'en ngoda'a txen len Cristo Jeso'osən'.

<sup>15</sup>Dižə' quinga naquən de'e li na' zjəzaquə'ən par šejle'echo, de que "Jesucristən' bide' yežlyo nga par ničh chebeje' beñə' xni'a de'e malən'." Na' nada' chacda' goca' le'ezelaogüe beñə' güen de'e mal. <sup>16</sup>Pero la'anə'əczə goca' le'ezelaogüe beñə' güen de'e mal, Jesocristən' beži'ilaže'e nada' par ničh blo'e catec yełə' chxenləžə' nape'. Na' de'en beži'ilaže'e nada' yoguə' beñə' ze'e so'onlilaže'ene' na' ze'e yesə'əzi'e yełə' mban zejlicane sa'acbe'ine' de que nape' yełə' chxenləžə' xen. <sup>17</sup>Ledoye'elaoch Rei čhechon' na'a na' zejlicane, ben' cui te čhei na' zoe' zejlicane. Cheyalə' güe'echone' yełə' bala'an. Le'enə' cui no chac le'i, na' naque' beñə' sin'. Tozə le' zaque'e par güe'ela'ochone'. Na' can' naquəczən.

<sup>18</sup>Xi'inda'ogua'a Temtio, de'e quinga chzoja' le' le'e cart nga, chona' mendad gono' xšin

Diozən' do yichj do lažo'o la'anə'əczə catə' naquən zdebə. Che'enda' žjəsa'alažo'o can' gwsə'on beṇə' golə blao entr chio'o chonlilažə'əcho Cristən', bagwso'e dižə' bosə'ozenene' chio'o de que bagwlej Diozən' le' par gono' xšine'enə'. Benšga xšin Diozən' can' gosə'əne'. <sup>19</sup>Na' leczə gwzo chech gonlilažo'o Cristən', na' gono' ca ənezdo' lo'o yichjla'aždaogo'o de que bitobi de'e mal chono'. Baļə beṇə' bito besyə'ədinjəne' xtolə'əga'aque'enə' la'anə'əczə gosə'ənezene' lo'o yichjla'aždaoga'aque'enə' de que bagwso'one' de'e malən', na' de'e na'ana' bitoch chso'onlilaže'e Diozən'. <sup>20</sup>Can' bagwso'on Imeneo na' Ljandr. Chžona' so'on beṇə' ca' txen len chio'o chonlilažə'əcho Cristən' na' chṇabda' Diozən' güe'le latjə gon Satanasən' con nac chene'en len lega'aque' par niçh əsa'acbe'ine' de que bito cheyaļə' yoso'ožia yoso'onite'e Diozən'.

### Nac cheyaļə' goncho orasyonṇə'

**2** Na' chnia' le' de yeto de'en naquə de'e žialao gon yoguə'əcho. Catə' ndopə nžagcho par cho'ela'ocho Diozən' cheyaļə' goncho orasyon par yoguə'əloļ beṇə', ṇabcho gaquəlen Diozən' lega'aque', na' güe'echo yeļə' choxcwlen che Diozən' por lega'aque'. <sup>2</sup>Lezczə cheyaļə' goncho orasyonṇə' par no rei na' par yoguə' beṇə' gwnabia' ca', par niçh gaquə so cuzcho binlo, na' par niçh bitobi əgwžon güe'ela'ocho Diozən'. Cheyaļə' goncho de'en naquə güen laogüe'enə' na' lao

beṇəçən'. <sup>3</sup>Naquən güen goncho orasyonṇə' ca', la' Diozən' ben' babebej chio'o xni'a de'e malən' cho'olaže'e goncho ca'. <sup>4</sup>Diozən' chene'ene' yebeje' yoguə' beṇə' xni'a de'e malən'. Lezczə chene'ene' yesə'ənezene' na' se'ejle'e dižə' li che'enə'. <sup>5</sup>Tozə Diozən' zaqu'e par güe'ela'ochone', na' tozə ben' zo fabor chio'o lao Diozən', le'enə' Jesocristən' ben' goljə beṇəç. <sup>6</sup>Jesocrist nan' bnežjw cuine' gwduxjue' xtolə' yoguə' beṇəç. Dezd gwłalte Diozən' bsi'e xneze nitə' beṇə' yesə'əyixjuie' che Jesocristən' na' catə'ən bžin žan' bžie' bia'anə', gosə'əyixjuie' de que Jesocristən' bnežjw cuine' gwsə'ote'ene' por ni checho. <sup>7</sup>Na' lezczə de'e na'ana' gwlej Diozən' nada' par naca' apostol che' na' par əchyixjui'a dižə' li che'enə'. Bsele'e nada' chsed chlo'ida'an beṇə' ca' cui zjənaquə beṇə' Izrael par niçh so'onlilaže'ene'. Cho'a dižə' li notono chxəoyaga' əṇia' ca'.

<sup>8</sup>Na' yeto de'e che'enda' gonle, yoguə' latjə gan' chdopə chžagle par cho'ela'ole Diozən', beṇə' byo ca' cheyaļə' so'one' orasyonṇə' lao ndopə nžagle. Cheyaļə' gaquə la'ažda'oga'aque'en xi'ilažə', na' notono yesə'əže'e na' notono sa'acyože' par niçh Diozən' əgwzenague' chega'aque' catə' so'one' orasyonṇə'. <sup>9</sup>Na' lezczə no'ol ca' cheyaļə' yoso'opa'a cuinga'aque' ca cui nite'e zban. Pero bito cheyaļə' cue' yichjga'aque' porzə par nite'e xoche, o par yesə'əguale'e bga o ret de or o de perlas. Na' bitotec yesə'əbe' yichjga'aque' gaquə yišə' yichjga'aque'en xoche o par

yesə'əzi'e xaga'aque' de le'eyə'.  
<sup>10</sup> Cheyalə' nite'e so'one' de'e  
 güen, can' chene'e Diozən' so'on  
 notə'ətezəchlə no'olə bagwso'on  
 lyebe de que əso'elaogüe'ene'.  
<sup>11</sup> No'olə ca' cheyalə' yesə'əzəxjw  
 yichjga'aque' yoso'ozenague' che  
 beṇə' ca' choso'osed choso'olo'ine'  
 xtižə' Diozən' na' bitobi dižə'  
 əso'e lao coltən'. <sup>12</sup> Bito cho'a  
 latjə par niçh no'ol ca' yoso'osed  
 yoso'olo'ine' xtižə' Diozən' lao  
 coltən', con nitə'əteze' žizə. Na' bito  
 yesə'anabi'e beṇə' byo. <sup>13</sup> Chnia'  
 ca' la' Diozən' zgua'atec bene'  
 Adannə' na' techlə bene' Ebən'.  
<sup>14</sup> Na' catə' gwxiye'en benən par  
 niçh beṇə' nech ca' gws'o'one' de'e  
 malən' bito bxoayaguən Adannə',  
 sino bxoayaguən no'ol che'lenə'  
 par niçh besə'əxope' gws'o'one'  
 de'e malən'. <sup>15</sup> De'e na'anə' no'ol  
 ca' chəsə'əžaglaogüe' catə'  
 chəsə'əzane'. Pero žjəsyə'anite'e  
 len Diozən' zejlicane šə nitə'əteze  
 nite'e so'onlilaže'ene'. Leczə  
 cheyalə' sa'aquene' che Diozən'  
 na' əsa'ac la'ažda'oga'aque'lenə'  
 xi'ilažə' na' bito so'e latjə ṇabia'  
 la'ažda'omalga'aque'lenə' lega'aque'.

**Nac cheyalə' so'on beṇə' ca'  
 choso'ogüia choso'oye' beṇə' ca'  
 chso'onlilažə' Jesocrisən'**

**3** De'e li can' chesə'əne':  
 "Notə'ətezə beṇə' šə chene'ene'  
 əggüia əgwy'e' yeziquə'əchlə  
 beṇə' chso'onlilažə' Jesocrisən',  
 chene'ene' gone' to žin de'en  
 zaquə'əchgua." <sup>2</sup> Catə' cuejle to beṇə'  
 par əggüia əgwy'e' yeziquə'əchlə  
 beṇə' chso'onlilalzə' Jesocrisən',  
 lecuej to beṇə' zotezə zoe' chone' ca

notono gaquə əṇe' de que de'e malən'  
 chone'. Lecuej beṇə' zo tozə no'ol  
 chei, beṇə' cui choe' latjə ṇabia'  
 la'ažda'omale'lenə' le', beṇə' chnabia'  
 cuine' par chone' can' chazlažə'  
 Diozən', beṇə' chon ca beṇə' yoblə  
 chsa'ape'ene' respet, beṇə' chebei  
 chgüialaogüe' beṇə' liže'lenə', na'  
 beṇə' neze nac əgwsed əgwlo'ine'  
 xtižə' Diozən' binlo. <sup>3</sup> Bito cuejle  
 beṇə' güe'e zo, o beṇə' naquə beṇə'  
 gotil, o beṇə' chzelažə' gone' gan  
 mechən', o beṇə' chon znia par niçh  
 yoso'ozenag beṇə' che', sino cuejle  
 beṇə' naquə gaçjwlažə'. <sup>4</sup> Lecuej  
 beṇə' chnabia' xi'ine' ca' binlo len  
 notə'ətezəchlə beṇə' nita' liže'lenə'.  
 Lecuej beṇə' chon byen yoso'ozenag  
 xi'ine' ca' che' na' beṇə' chon ca  
 chsa'apbo' le' respet bitə'əteze  
 de'en chone'. <sup>5</sup> La' šə to beṇə' bito  
 chac ṇabi'e family che'lenə' binlo,  
 bito nezene' nac gone' par əggüia  
 əgwy'e' beṇə' ca' bagwlej Diozən'  
 par chesə'ədopə chesə'əžague'  
 chso'elaogüe'e Jesocrisən'.  
<sup>6</sup> Bito cuejle to beṇə' ze'e gwzolao  
 chonlilaže'e Diozən', la' šə cuejle  
 to beṇə' cobə gonlja cuine' xen can'  
 ben de'e gwxiye'lenə' na' si'e castigw  
 ca castigon' si' lennə'. <sup>7</sup> Cuejle beṇə'  
 chon par niçh beṇə' ca' cui zjanaque'  
 txen len chio'o yesə'ənezene' de que  
 chone' de'e güen, la' šə cui zotezə  
 zoe' chone' de'e güen, gwžinlja ža  
 catə' yoso'ožia yoso'onitə' beṇə' le'  
 na' əxope' lao na' de'e gwxiye'lenə'.

**Nac cheyalə' sa'ac beṇə' ca'  
 əsa'aque' comisyon che chio'o  
 chonlilažə'əcho Jesocrisən'**

<sup>8</sup> Na' catə' cuejle beṇə' ca' əsa'ac  
 comisyon che le'e chonlilažə'əle

Jesocristən' gan' zolen', lecuej beṇə' zjəzaquə' par gapəga'achone' respet, na' beṇə' bito zjənaquə beṇə' goxoayag, beṇə' cui zjənaquə beṇə' güe'e zo, beṇə' cui chesə'əzelažə' so'one' gan mechən' len xšin Diozən'. <sup>9</sup> Lecuej beṇə' nitə'ətezə nite'e chse'ejle'e che de'en babzejni'i Diozən' chio'o che Jesocristən' de'en cui no gwṇeze antslə, beṇə' chso'on ca chesə'əneze'ne' lo'o yichjla'ažda'oga'aque'ena' de que chso'one' can' chazlažə' Diozən'. <sup>10</sup> Cheyałə' ggüiale can' chso'on beṇə' ca' chaquele cuejle par əsa'aque' comision chele šə chso'one' can' bagwnia' cheyałə' so'one', na' šə yesə'əchoje' binlo sin cui bi bi falt chega'aque' əžel, nachən' cuejle lega'aque' par əsa'aque' comisionnə'. <sup>11</sup> Leczə ca' no'ol ca' chso'on xšin Diozən' cheyałə' əsa'aque' beṇə' zjəzaque'e par gapəga'acchone' respet, cheyałə' əsa'aque' beṇə' cui choso'ožia choso'onite'e beṇə' yoblə, cheyałə' əsa'aque' beṇə' cui chso'e latjə nabilia' la'ažda'omalga'aque'en lega'aque', na' cheyałə' əsa'aque' beṇə' nitə'ətezə nite'e chso'one' complir con can' chene'e Diozən'. <sup>12</sup> Na' catə' cuejle beṇə' ca' əsa'ac comision che le'e chonlilažə'əle Jesocristən' gan' zole, lecuej beṇə' zjəzo tgüejzə no'ol chei na' lecuej beṇə' chesə'ənabilia' xi'inga'aque' na' notə'ətezəchlə beṇə' nitə' ližga'aque' can' chazlažə' Diozən'. <sup>13</sup> Beṇə' ca' zjənchoj par zjənaque' comisionnə' šə so'one' binlo yesə'əzi'e yełə' bala'an xen, na' leczə so'onlilažə'əchgüe' Jesocristən' na' bito yesə'əžebe' laogüe'ena'.

**Notono gwṇeze antslə de'en  
babzejni'i Diozən' chio'o**

<sup>14-15</sup> Zoa' lez yob yida' delana'a  
le', pero bzoja' de'e ca' chedə'

bito nezdə' batən' gaquə yida' na' che'enda' ənezdo' nac cheyałə' gon chio'o naccho family che Diozən'. Dioz ben' zo zejlicane bagwleje' chio'o par chdopə chžagcho cho'ela'ocho Jesocristən' na' de'e na'anə' naccho family che'. Na' Diozən' babzejni'ine' chio'o dižə' li che'ena' par chzejni'ichon beṇə'. <sup>16</sup> Notono gwṇeze antslə de'en babzejni'i Diozən' chio'o nua'a, na' chejle'echon na' naquən de'e žialao xen.

Jesocristən' bide' golje' benəch, na' Spirit che Diozən' blo'en de que naque' doalje xi'in Dioz. Angl ca' besyə'əbeine' besə'əle'ine' le'.

Na' bžin ža beyepe' yoban' bezi'e yełə' gwnabia' che'ena' na' yełə' bala'an che'ena'. Na' beṇə' ca' chso'e xtiže'ena' bagosə'əyixjui'en yoguə' nasyon, na' zan beṇə' ža' doxen yežlyo nga bachso'onlilaže'ene'.

**Ežin ža yesə'əbejyichj beṇə'  
dižə' li che Diozən'**

**4** Clar bagwna Spirit che Diozən' de que əžin ža bałə beṇə' yesə'əbejyichje' dižə' li che Diozən'. Yesə'əbejyichje'en ca de'en yoso'ozenague' che beṇə' ca' yoso'osed yoso'olo'i dižə' güenlažə', na' yoso'ozenague' che beṇə' ca' yoso'osed yoso'olo'i dižə' de'en za'ac che de'e xio' ca'. <sup>2</sup> Beṇə' goxoayag ca' beṇə' ca' yoso'osed yoso'olo'i dižə' güenlažə' na' bitoch bibi əsa'aque'ne' lo'o yichjla'ažda'oga'aque'ena' catə'an yesə'əxoayague' o catə'an so'one'

bichlā de'e mal. <sup>3</sup>Yoso'oōzone' no yoso'oōsagna', na' yesə'əne' de que bito gaquə gaocho balə yelə' guao la'aṇə'əczə Diozən' bene' par niḥ zjəden. Na' bene' yoguə' yelə' guao ca' par niḥ chio'o chonlilažə'əchone' na' nombi'acho de'en naquə de'e li gaoga'acchon na' güe'echone' yelə' choxcwlen. <sup>4</sup>Na' de'en bene' yoguə' de'e ca' nezecho zjənaquən güen na' bito zjənaquən par gue'iga'aquechon, con güe'echo Diozən' yelə' choxcwlen par de'e ca' chone' chio'o. <sup>5</sup>Zjənaquən güen par gaoga'acchon chedə' cho'echo Xtižə'lenə' catə' choncho orasyon cho'echo yelə' choxcwlen che' par lega'aquən.

**Nac cheyalə' so'on beṇə'  
ca' yoso'osed yoso'olo'ine'  
xtižə' Jesocristən'**

<sup>6</sup>Na' Temtio, par niḥ yebeichgüei Jesocristən' can' chono' xšine'lenə' cheyalə' əgwzejni'ido' beṇə' bišə'əcho beṇə' ca' chso'onlilažə' Jesocristən' de'e ca' bagwnia' le'. Šə gono' ca' gaquəlenən le' par sotezə so' gonlilažə'əcho' Jesocristən' na' talencho' dižə' li che Diozən' de'en bachdalenə' na'a. <sup>7</sup>Bito gone chio' dižə' güenlažə' de'en chsa'aljlažə' beṇə' ca' cui chso'elao' Diozən'. Chso'e dižə' ca dižə'ən chsoe' balə no'olə gol ca' len bidao' ca' de'e cui zaquə' šejle'echo chei. Pero na' le' bsd par niḥ šejəch goncho' can' chene'e Diozən'. <sup>8</sup>Nezecho de que catə' choncho jersisy chaclenən cuerp chechon', na' catə' choncho can' chene'e Diozən' caguə cuerp checho na'azən' chaclenən, sino chaclenczən chio'o par zocho

mbalaz na'a lao mbancho na' ca'aczə catə' žjəyechocho len Diozən'. <sup>9</sup>Naquən de'e li na' zaquə'ən par šejle'echo chei. <sup>10</sup>Na' Diozən' chone' par niḥ de yoguə' de'e chyažje yoguə' beṇə' par niḥ zjəmbane', na' chone' yelə' mban zejlicane che chio'o chonlilažə'əchone'. Na' de'en zocho lez žjəyechocho len Dioz ben' zo zejlicane, chonchguacho xšine'lenə' na' chgo'o chchejlažə'əcho catə' chəsə'əzi'ichižə' beṇə' chio'o.

<sup>11</sup>Bsd blo'i beṇə' de'e quinga babzejni'ida' le' na' gono' mendad so'one' can' bagwnia'. <sup>12</sup>La'aṇə'əczə ne'e naco' beṇə' xcuida' bito go'o latjə yesə'əzo beṇə' le' ca'alə cui yoso'ozenague' chio'. Len bitə'ətezə əṇao' na' len yoguə' de'en chono' blo'i beṇə' ca' chso'onlilažə' Jesocristən' nac cheyalə' so'one', na' naquən' cheyalə' sa'aque'ne' che Diozən' na' che ljuežjga'aque' na' nac cheyalə' nitə'ətezə nite'e so'onlilažə'e Jesocristən', na' nac cheyalə' so'one' par niḥ la'ažda'oga'aque'lenə' əsa'aque'ən xi'ilažə'. <sup>13</sup>Mientr yida' gan' zo'onə' gwlec yichjo' blab Xtižə' Diozən' de'en nyojən len beṇə' ca' chesə'əadopə chesə'əžag chso'elaogüe'e Jesocristən' na' gwduxje'le' dižə' güen dižə' cobə che'lenə', na' bzejni'i beṇə' bi zeje xtižə' Diozən'. <sup>14</sup>Ben yoguə'əlo' de'en gwlej Diozən' le' par gono' catə'ən boso'oōxa na' beṇə' golə beṇə' blao ca' yichjo'on na' boso'ozenene' le' de que Diozən' gwleje' le' par gono' xšine'lenə'. <sup>15</sup>Gwlec yichjo' ben yoguə' can' gwgnia' par niḥ yoguə' beṇə'

yesə'ələ'ine' can' zdach chono'  
can' chene'e Diozən'. <sup>16</sup>Gwdapə  
cuidad ben con can' chazlažə'  
Diozən', na' bsed blo'i beṇə' so'one'  
ca'. Šə gono' ca' gaquəlenən beṇə'  
ca' choso'ozenag xtiž'o'onə' par  
yesyə'əchoje' xni'a de'e malən' na'  
leczə gaquəlenən le'.

**Can' cheyałə' goncho len beṇə'  
ca' chso'onlilažə' Cristən'**

**5** Šə bi de'en chon to beṇə' golə,  
bito tiło'one' sino gwṇeyoine'  
can' cheyałə' gone', ben can' chono'  
len xao'. Na' šə bi de'en chon to  
beṇə' xcuidə' bzejni'ine' ca bišo'o.  
<sup>2</sup>Na' šə bi de'en chon to no'olə  
golə, bzejni'ine' can' chono' len  
xna'o, na' šə bi de'en chon to no'olə  
xcuidə' bzejni'ine' ca to zano' par  
nič notono gaquə əṇe' de que de'e  
malən' chono'.

<sup>3</sup>Cheyałə' goncho mantener no'ol  
ca' bagwsa'at be'en čhega'aque', šə  
zjənaque' doalje gozebə. <sup>4</sup>Pero šə  
nitə' xi'inga'aque' o xesoaga'aque'  
bzejni'i beṇə' ca' de que cheyałə'  
so'one' lega'aque' mantener čhedə'  
beṇə' gol ca' babosyo'osgole'  
lega'aque'. Chazlažə' Diozən'  
goncho mantener beṇə' golə lao  
family che checho. <sup>5</sup>No'ol ca'  
zjənaquə doalje gozebə, beṇə'  
ca' notono family čhega'aque'  
nitə', nite'e lez gaquəlen Diozən'  
lega'aque' na' chso'ontezə chso'one'  
orasyon teža na' še'elə. De'e na'anə'  
zjəzaque'e par goncho lega'aque'  
mantener.

<sup>6</sup>No'olə gozeb ca' chso'on xbab  
so'one' con can' chse'enene'  
zjənaquəga'aque' ca beṇə' guat len  
yichjla'ažda'oga'aque'enə' de'en

cui choso'ozenague' čhe Diozən'.  
<sup>7</sup>Yoguə' de'e ca' bagwni'anə'  
gono' mendad so'on beṇə' ca'  
chso'onlilažə' Cristən' par nič  
notono gaquə əṇe' de que chio'o  
chonlilažə'əcho Cristən' bito  
choncho can' cheyałə' goncho. <sup>8</sup>Šə  
nocho cui gaquəlencho no parient  
čhecho len de'en chəsə'əyažjene',  
bito choncho can' cheyałə' gon  
chio'o chonlilažə'əcho Cristən' na'  
napəchcho dolə' cle ca beṇə' ca' cui  
zjənombia' Cristən'. Na' peorəch šə  
cui choncho mantener no'ol čhecho,  
xi'iṇcho, na' xaxna'acho.

<sup>9</sup>Quinga nezele noe' no'olə  
gozeb ca' cuejle par nič le'e  
chdopə chžagle cho'ela'ole Cristən'  
gonle lega'aque' mantener. Šə  
banite'e gyon iz o mazlə, na' šə  
gwnitə' tgüejzə be'en čhega'aque',  
<sup>10</sup>na' šə beṇə' zan chəsə'əne'  
bagwso'onchgüe' de'e güen ca  
de'en bosə'əsgole' no bidao' o  
chəsə'əgüialaogüe' beṇə' zitə'  
ližga'aque'enə', o chsa'aclenchgüe'  
yeziquə'əchlə beṇə' bagwlej  
Diozən' par zjənaque' lažə'  
ne'enə', o chsa'aclene' beṇə'  
chəsə'əyi' chəsə'əzaque'e, o šə  
bagwso'onchgüe' bitə'ətezəchlə  
de'e güen nachən' zjəzaque'e par  
cuejga'aclene'.

<sup>11</sup>Pero bito cuejle no'olə gozeb ca'  
zjənaquə beṇə' xcuidə' la' gwžinlja  
ža se'enene' yesə'əbejyichje'  
xšin Cristən' na' se'enene'  
yesyə'əšagne'e de'e yoblə. <sup>12</sup>Na'  
šə yesə'əbejyichje' xšin Cristən'  
əsa'ape' dolə' de'en cuich so'one'  
can' gwso'one' lyebe. <sup>13</sup>Na' no'olə  
gozebə xcuidə' ca' bito gonga'aclene'  
mantener. De'en yesə'əlažə'e liž

benə', so'olaogüe' cui so'one' žin na' əsa'aque' benə' güilj gwıxan dižə' na' yesə'əgüiazeche' bin' chso'on benə' yoblə, na' so'e dižə' che de'en cui cheyalə' so'e dižə' chei. <sup>14</sup>Chacda' güen šə no'olə gozebə xcuidə' ca' yesyə'əšagne'e de'e yoblə na' yesə'əzane' na' yosyo'osgol xil'inga'aque', na' yosə'əgüia yoso'oye' xmendadga'aque' de'e de ližga'aque', par niç notono benə' contr checho gaquə əne' de que de'e malən' choncho.

<sup>15</sup>Balə no'olə gozebə xcuidə' ca' bagosə'əbejyichje' Cristən' par zjəsə'ənaogüe' Satanəsən' de'en chnabia' de'e xio' ca'.

<sup>16</sup>Notə'ətezə benə' chso'onlilažə' Cristən' šə lao family chega'aque'enə' nitə' no'ol ca' bagwsa'at ben' chega'aque', cheyalə' so'one' lega'aque' mantener par niç benə' ca' chəsə'ədopə chəsə'əžag chso'elaogüe'e Jesocristən' bito so'one' lega'aque' mantener, sino so'one' mantener no'ol ca' zjənaquə doalje gozebə.

<sup>17</sup>Benə' ca' bagwlejlə par zjənaque' benə' golə benə' blao lao le'e chonlilažə'əle Cristən' šə chso'one' binlo de'en ngo'o lao na'aga'aque' so'one', zjəzaque'e par gaple lega'aque' respet na' par chixjwle che gast chega'aque'enə', na' mazəchlə šə noe' chesə'əyixjuie' xtižə' Diozən' na' choso'osed choso'ololine' bi zejennə'. <sup>18</sup>Zjəzaque'e par gonle ca' la' nyojən le'e Xtižə' Diozən' nan: "Bito əgwseyjwle cho'a go'on ca' par niç cui gaquə sa'ob žlac choso'olej choso'ošəjəb trigon' par chchoj xeinə'." Na' leczə nyojən nan: "To benə' güen žin cheyalə' si'e laxjue'."

<sup>19</sup>Bito gono' cas šə no gao xyan' contr to benə' golə benə' blao lao le'e chonlilažə'əle Cristən' šə cui zo yeto o yechopə testigw benə' əso'e dižə' de que de'e malən' chon be'enə'. <sup>20</sup>Pero šə de'e li chone' de'e malən', cheyalə' tilo'one' lao yoguə' benə' ca' chəsə'ədopə chəsə'əžag chso'elaogüe'e Jesocristən' par niç yeziquə'əchlə benə' ca' chso'elao' Jesocristən' yesə'əžebe' so'one' de'e malən'. <sup>21</sup>Diozən' na' Xancho Jesocristən' na' angl benə' ca' zjənchoj par chso'one' mendad che Diozən' zjənaque' testigw chia' de'en chona' mendad gono' can' bagwnia' le' le'e cart nga. Tozəczə can' gono' len notə'ətezə benə', ni toe' cui gono' xench. <sup>22</sup>Bito yob cuejo' notə'ətezə benə' par gaque' benə' golə benə' blao lao le'e chonlilažə'əle Cristən', la' šə əxope' gone' de'e mal lenczo' le' gapo' dolə' šə ca'. Ben par niç gactezə gaquə yichjla'ažda'ogo'onə' xililažə'.

<sup>23</sup>De'en chacšendo' telizə, bitoch ye'ejə' slezə nis, sino güe'ej latə' bino par niç gaquəlenən li'onə'.

<sup>24</sup>Nacbiaxejə de'e mal de'en chso'on balə benə' antslə ze'e əžin ža əsa'aque' castigw che xtolə'əga'aque'enə'. Pero na' yebalə' bito yob gacbe'icho šə chso'one' de'e mal. <sup>25</sup>Na' leczə can' naquən len benə' chso'on de'e güennə'. Balə' nacbiaxejə de'e güennə' chso'one', na' yebalə' bito nacbia' pero gwžin ža la'alaon.

**6** Yoguə' mos benə' ca' chso'onlilažə' Cristən' cheyalə' əsa'ape' xanga'aque'enə' respet, par niç xanga'aque' ca' bito yesə'əne' contr Diozən' ben' cho'ela'ocho na'



contr de'en chsed chlo'icho. <sup>2</sup>Na' šə xanga'aque' ca' leczə chso'onlilaže'e Cristən', mos ca' bito cheyalə' so'one' xbab cui yoso'ozenague' čhega'aque' por ni che de'en zjənaque' txen chso'onlilaže'e Cristən'. Mazəchlə cheyalə' so'one' žinŋə' do yichj do lažə'əga'aque' čhedə' xanga'aque' beŋə' ca' chso'one' žin čhei chso'onlilaže'e Cristən' na' Diozən' chaquene' čhega'aque'. Gwdixjue' de'e ca' babzejni'ida' le' na' bsed blo'in.

**Cheyalə' socho content len de'e de čhecho laogüe de'en chonlilažə'əcho Jesocristən'**

<sup>3</sup>Nitə' beŋə' choso'osed choso'olo'ine' dižə' de'en cui zdan lebe len de'en bağwnia' le' na' len dižə' güen che Xancho Jesocristən' na' len bitə'ətezəchlə de'en chzejni'icho beŋə' par chso'elaogüe'e Diozən'. <sup>4</sup>Beŋə' ca' choso'osed choso'olo'ine' clelə chso'on cuinga'aque' xen chsa'aquene' zjənezene' len la' bitobi chse'ejni'ine'. Beŋə' ca' chso'on ca' con zjəchi' yichjga'aque' chesə'ədilə chesə'əšašlene' beŋə' yoblə, na' chso'e dižə' che no pont dao' de'en choso'osed choso'olo'ine' de'en cui naquə de'e žialao. De'en chesə'ədilə chesə'əšaše' che biza de'en nac ca' chonən par ničh chsa'acxi'i ljeužjga'aque', na' chsa'acyože' beŋə', na' choso'ožia choso'onite'e beŋə', na' chso'one' xbab mal che beŋə', <sup>5</sup>na' chesə'əža'a ljeužjga'aque' toe' yetoe'. Beŋə' ca' chso'on ca' choso'ozenague' che la'ažda'omalga'aque'enə' na' bito zjənombi'e de'en naquə de'e

li. Malən' chso'one' choso'osed choso'olo'ine' che Diozən' parzə ničh so'one' gan. Bito gono' txen len beŋə' ca' chso'on ca'. <sup>6</sup>De'e liczə de'e xen de'e zedegua'an par chio'o šə cho'ela'ocho Diozən' na' šə zocho mbalaz len de'e dao' de čhecho. <sup>7</sup>Can' na dicho nga: “Ga'alchon' catə'ən bla'acho yežlyo nga na' ga'alchon' yeza'acho.” <sup>8</sup>Cheyalə' socho mbalaz šə de de'en che'ej de'en chaocho, na' šə de xala'ancho, na' gan' chtascho. <sup>9</sup>Beŋə' ca' zjəchi' yichjga'aque' gatə' de'e zan šinlazga'aque', de'e zan bien čhega'aque' o mech xen čhega'aque' choso'ozenague' che de'e malən'. Can' chac chesə'əxope' lao na' gwxiye'en. Choso'ozenague' che la'ažda'omalga'aque'enə' par chso'one' de'e zan de'e cui zjəzaquə' na' de'en chso'on mal len lega'aque'. Beŋə' ca' chso'on ca' yesə'əbiayi'e na' əsa'aque' castigw zejlicane. <sup>10</sup>La'ažda'omalchon' gwzenaguən che bitə'ətezə de'e mal šə chebeichgüeicho mechən'. Bałə beŋə' de'en chesə'əbeichgüeine' mechən' bagosə'əbejyichje' dižə' li che Diozən' na' de'e zan de'en chesə'əžaglaogüe' yełə' güen de'e mal čhega'aque'enə'.

**Cheyalə' cuec yichjcho goncho xšin Diozən' do yichj do lažə'əcho**

<sup>11</sup>Pero na' le' naco' beŋə' güen xšin Diozən', bito yebeido' de'e ca' zjənac ca', sino güe'elažo'o gono' de'en naquə güen lao Diozən', na' šejəch goncho' can' chene'ene'enə' na' gonlilažə'əcho'one', na' gaquəchdo' che' na' che beŋə'čən', na' sotezə so' gonlilažo'o Diozən'

catə' de de'e saquə'əzi'o, na' gaquəcho' beṇə' gaxjwlažə'. <sup>12</sup>Ca to deportist chone' do yichj do laže'e yoguə' de'en cheyalə' gone' par niç si'e premio, le'egatezə ca' le' gwlec yichjo' ben xšin Diozən' do yichj do lažo'o laogüe de'en chonlilažo'one'. Gwlec yichjo' de'en žjəyozo' len Diozən' zejlicane chedə' Diozən' gwleje' le' par žjəyozo' len le', na' bi'o dižə' li lao beṇə' zan de que chonlilažo'one'. <sup>13</sup>Ca'aczən' be' Jesocristən' dižə' li lao Ponsio Pilatən' de que chonlilaže'e Diozən'. Na' na'a lao Jesocristən' na' lao Diozən' ben' chnežjo yelə' mban che beṇəchən', na' bia chsa'aš, na' biquə'əchlə de'e zjəmban, <sup>14</sup>chona' mendad gono' yoguə' de'en nezdə' chene'e Diozən' gono'. Benən xte ca yidə Xancho Jesocristən' de'e yoblə par niç notono gaquə əṇa de que cui chono' can' chene'e Diozən'. <sup>15</sup>Yidə Jesocristən' de'e yoblə catə' əžin ža əžin or əgwžia Diozən' bia' yide'. Tozə Diozən' chnabi'e doxenlə, na' le'enə' cho'ela'ocho. Le'enə' naque' Rei ben' chnabia' yoguə' rei ca' yelə', na' naque' Xancho ben' chnabia' yoguə' beṇə' gwnabia' ca' yelə'. <sup>16</sup>Tozə le' chone' chio'o yelə' mban zejlicane na' tant yo'o yelə' chey che'eni' che'enə' gan' zo'enə' xte notono nochlə gaquə bigue'e gan' zo'enə'. Notono beṇə' lao yežlyo nga ne'e le'ine' le' na' notono no gaquə le'ine' le'. Cheyalə'

güe'ela'ocho' la' le'enə' chnabi'e zejlicane. Na' can' gonšgaczcho.

<sup>17</sup>Na' ca naquə beṇə' ca zjənaque' beṇə' gwni'a yežlyo nga, ben mendad bito əsa'aque' beṇə' ya'alažə', na' bito so'one' xbab nite'e mbalaz por ni che yelə' gwni'a chega'aque'enə' chedə' ca naquə yelə' gwni'anə' de'e te chein'. Cheyalə' nite'e lez gon Diozən' ca nite'e mbalaz, la' le'enə' chone' chio'o yoguə' de'en naquə de'e güen par niç yebeichon. <sup>18</sup>Beṇə' gwni'a ca' cheyalə' cue' yichjga'aque' par so'one' porzə de'e güen, so'one' de'en chebei Diozən', yesə'əchine' xmechga'aque'enə' par əsa'aclene' beṇə', na' bito əsa'aque' beṇə' rgüin. <sup>19</sup>Šə bach chso'one' ca', bachso'one' can' chene'e Diozən' gon chio'o de yelə' mban zejlicane checho na' gaquəlenən lega'aque' tyemp de'en zezə'.

#### Yeto de'en gože' Temtion'

<sup>20</sup>Temtio dao' gwlecchgua yichjo' yoguə' de'en babzejni'i Diozən' le'. Bitobi cas gono' che bitə'ətezə de'en yesə'əna beṇə' ca' chso'onlajažə' chəsə'əne' de que xtižə'əga'aque'enə' naquən de'e sin', chedə' bitobi zaquə'ən lao Diozən'. <sup>21</sup>Beṇə' ca' chəsə'əna ca' bagosə'əbejyichje' dižə' li che Diozən' na' bitoch chso'onlilaže'ene'.

Na'a ža gaquəlenšga Diozən' le'. De'e na'azən' chzoja'. *Pab*